

鶴慶州志卷之一

星野

古者侯伯之國僅百里則未及今一大郡而子男之邦方六七十如五六十則比於今一小縣而已顧彼猶卽其所分之野國自爲占以察機祥而存警戒今盡天之垂象而概以朝暮事當之一郡一邑其休徵戾氣若盡不相感召天道要不若是矣夫一郡一邑之長有君道焉休徵戾氣昔之應在分茅者今之應在分符守斯土者能勿惕然於天人之不甚相遠乎志星野

星官書無慮數十家言俱以井鬼屬雲南謂近蜀者
益州近秦者雍州僧一行亦屬井鬼而何承天郭守
敬劉基皆是其說

班固地理志云東井輿鬼分野牂牁越雋益州宜屬
焉此益州蓋謂滇在漢爲益州郡特指滇南而言非
巴蜀之益州與禹貢之冀州也

按周禮保章氏以星土辨封域以分星觀災祥顧其
書旣亡矣而費陳蔡張諸儒爲說紛紛其所謂實沈
之次其州曰益是也而晉書乃謂自畢至井魏之分
野屬益州夫魏分晉地朱子云河內河東皆魏地其

去益州遠矣攷玉厯通政謂觜在燕參在晉雲南在
井之二十九度則參觜於滇固渺不相涉况鶴去滇
垣千餘里而可以爲觜參分界哉郡縣志云鶴分屬
於柳宿間似爲得之

柳宿步天歌

猶如北斗顛倒掛尾餘一點彈丸六三星酒旗懸柳
梢天開醺醪真堪訝



鶴慶州志卷之二

祥異

災眚來而傲懼災不爲妖祥瑞至而驕矜祥不爲
福回天心在修人事也乃或者謂嘉禾歧麥例當
詳書至於星隕地震之變不妨從畧意蓋在紀瑞
耳不知春秋之作於天地日星草木鳥獸螟螣水
旱之災屢書於冊而祥瑞則反不之及豈二百四
十年間雲物休徵之象不一見哉抑亦畧而不書
示懼也卽所以承天意也故志祥異

明

景泰五年夏逢密鄉產瑞麥一莖數穗者百餘本

知府王珉以獻

成化十四年四月壬午地震

正德六年十月甲辰地震壞城垣房廨人多被壓

死者

正德九年大疫死者不可勝計

正德十年五月六日地大震聲如雷官民房舍盡

圯

正德十五年三月丙申地震

嘉靖三十七年七月淫雨溢漲象眠山水洞淤塞

水不能洩廬舍禾稼湮沒殆盡越五十八日始消是年米價騰貴

嘉靖三十八年六月二十五日夜漁塘村雷雨大作西山崩水溢壞民居百餘所死者不可勝計郡伯林養高賑之

萬曆二十五年秋大雨雹損禾

萬曆二十六年夏旱蝗

萬曆二十七年夏大水無麥民饑

萬曆三十八年春五色雲見於南方

萬曆四十六年秋雷震玉屏山石一竅光澈如火

是年發科九人今呼爲文星石

萬曆四十八年大水無麥冬夜有白氣如雲橫天數月始散

萬曆間甸苴鄉民李成家豕生一獅一象獅巨口不能食象捲舌吸乳咸以爲異棄之三日乃死甸北民李永之弟年及冠化爲女子適人

天啟元年大水

天啟四年甘露降於松所在有之

天啟七年冬市火燬民居數十餘所

崇禎二年北衙大水居民溺死者數十人

崇禎四年大饑郡伯陳開泰設粥場三賑之夏麥
兩歧秋大熟甸北產嘉禾一莖九穗一莖數穗
者所在有之冬學廟災

崇禎七年秋神龍門大孟村大雨雹損禾

崇禎八年市火燬民居數十餘家

崇禎十年秋大雨雹損禾

國朝

順治元年大水淹沒禾苗

康熙二十七年地震壞城垣樓閣官舍民居各二

震聲吼如雷水沸三日乃止

四月朔大雪三尺

康熙三十八年市火燬民居百餘所先是三月前有白燕掠東門而出後白燕經過處皆燒燬人以爲燕字下從火蓋已爲之兆云

康熙四十六年七月大水淹沒禾苗無算

康熙五十三年六月淫雨水大漲月餘未消淹沒禾苗近千頃

七月白燕來從東門出居民以爲宜慎火後竟無恙

八月產嘉禾一莖兩穗

康熙五十六年十一月大雪值巡邊供役民夫凍死者數百人

嘉慶二十一年二十二年大饑民多死亡

道光十三年八月地震九月又震

咸豐九年麥九穗慧星見西方大如帚觀音寺瓜
籐結如龍形

同治十一年金沙江水白如乳三日後兩岸積有
土厚三寸許

光緒三年淫雨水漲落水洞阻塞淹圯居民廬舍
無算

光緒五年至十四年松桂每居七八月間大疫死者不可勝計

光緒八年蚩尤旗見於東方長如匹練

光緒九年秋禾生雙穗雲現五色知州黃維中具報

光緒十一年松桂大火燬民居百餘家

十月二十一夜星隕如雨

光緒十五年新建玉屏書院上樑時五色雲現於

西南方

光緒十八年毛蟲食柳盡枯城鄉皆遍

光緒十九年七月西邑甲高姓雌鷄化雄

十一月二十一日夜間地動有聲移時天鼓鳴
光緒二十年三月大雨雹傷負郭隴麥無算

五月下庄獲豹

鶴慶州志卷之三

輿地志一

疆域

形勢

後附郵旅

凡郡之疆界以域民也惟鶴兼有邊防之責益以鶴當五代之時史萬歲自石門出漾弓唐韋舉遣幕府崔時佐趨雲南及元世祖入大理取滇地亦無不至自石門而石門去鶴僅一衣帶水若形勢之不審分防之不嚴譬之畫餅究無益於安攘之效也至於度其山林數澤原陵純鹵之地別其肥磽多少之數以爲等差俾民之域在疆以內者無有畸輕無有畸重則又係司土者之實心實政爲

之非徒爲紙上空談耳爲志疆域

鶴在省西北麗江府之東南東至於永北廳舊順州

上江大渡口界一百二十里南至大理府賓川州

羅川界一百三十里西至劍川州界九十里北至

麗江七河界五十里東南至朵美渡口永北廳界

一百二十里東北至瀋蕩州打中河界四百八十

里西南至大理府浪穹縣應山舖界一百八十里

西北至麗江府巨甸石門關界二百一十里東西

廣三百九十里南北袤一百七十里環千餘里至

省城一千一百二十里至京師一萬一千五百六